

**Umiatsiaararsorlutik aalisartut saarullinnik bundgarninik pisarineqartunik  
pisarineqareerlutik aniseqqinneqartut annertussusaat pillugit  
nalunaaruteqartarnissaat, kiisalu nalunaarutigineqartut Pinngortitalerfimmot  
atugassanngortinnejarnissaat qulakkeerniarlugu Naalakkersuisut  
suliniuteqarnissamik peqquneqarnissaat pillugu Inatsisartut  
aalajangiiffissaattut siunnersuut.**  
*(Inatsisartunut ilaasortamit Hans Aronsenimit, Inuit Ataqatigiit,  
saqqummiunneqartoq)*

### pillugu

**Aalisarnermut, Piniarnermut Nunalerinermullu Ataatsimiititaliap  
siunnersuutip aappassaaneerneqarneranut**

### **ISUMALIUTISSIISUTAA**

Ataatsimiititaliap suliariinninnermini kingullermik ilaasortarai:

Inatsisartunut ilaasortaq Hans Aronen, Inuit Ataqatigiit, Siulittaasoq  
 Inatsisartunut ilaasortaq Nivi Olsen, Demokraatit, Siulittaasup tullia  
 Inatsisartunut ilaasortaq Knud Kristiansen, Siumut  
 Inatsisartunut ilaasortaq Nikolaj Jeremiassen, Siumut  
 Inatsisartunut ilaasortaq Henrik Fleischer, Partii Naleraq  
 Inatsisartunut ilaasortaq Kelly Berthelsen, Inuit Ataqatigiit  
 Inatsisartunut ilaasortaq Villy Olsvig, Inuit Ataqatigiit

Ulloq 18. maj 2017 siullermeerinninnerup kingorna ataatsimiititaliap siunnersuut misissorpaa.

#### **Siunnersuutip imai siunertaalu**

Siunnersuutip nassatarissavaa umiatsiaararsorlutik aalisartut saarullinnik bundgarninik pisarineqartunik pisarineqareerlutik aniseqqinneqartut annertussusaat pillugit nalunaaruteqartarnissaasa kiisalu nalunaarutigineqartut Pinngortitalerfimmot atugassanngortinnejarnissaasa qulakkeerneqarnissaannut Naalakkersuisut suliniuteqarnissamut peqquneqarnissaat.

#### **1. Siunnersuutip Inatsisartunit suliarineqarnera**

Siunnersuut – tamakkiisuunngitsumik tapaserneqareerluni – Aalisarnermut, Piniarnermut Nunalerinermullu Ataatsimiititaliamut suliassanngorlugu innersuunneqarpoq.

## **Ataatsimiititaliap siunnersuummik suliaqarnera**

Aallarniutigalugu § 37 naapertorlugu apeqqummut akissutip nr. 20/2017-ip innersuussutiginissaanut ataatsimiititaliaq pissutissaqarsorivoq, tassani allassimalluni:

*"Pinngortitaleriffik naliliivoq imartatsinni aalisagaqassuseq malinnaaffigilluarlugu"*

Tamatumunnga atatillugu ataatsimiititaliamit maluginiarneqarpoq akissummi siuliani allassimasumi allassimasut saniatigut § 37 naapertorlugu apeqqummut nr. 26/2017-imut akissummi aamma allassimammat:

*"[...] Pinngortitaleriffik ukiut tamaasa sumiiffinni sinerissamut qanittumiittuni saarullinnik misissuisarmat, tassani aalisaqassutsip angissusia, qanoq ukioqarneri aamma angissutsikkut agguataarsimancerat missiliunneqartarluni. Peqatigalugu Pinngortitaleriffik ukiumoortumik misiligtissatut uuttuinernik amerlasuunik katersisarpoq, tassanissaq saarulliit aalisarnermi nalaanneqartartut qanoq angitiginerisa agguataarneqarsimancerisa naliliivigineqarnissaannut tamakku tunngaviliisartut. 2016-imi saarulliit inuussutissarsiutigalugu sinerissamut qanittumi aalisarnermeersut saarulliit 22.000-it Upernavimmiit Kalaallit Nunaata kujataanut agguataarlugit uuttorneqarput."*<sup>1</sup>

*"2017-imiit Pinngortitaleriffiup saarulleeqqanik misissuinera Maniitsup Kangaatsiallu eqqaanni kangerluit ilanggullugit annertusineqarpoq, taamaalilluni saarulleeqqat Nuup Qeqertarsuullu Tunuani akornanni sinerissami tamarmi misissorneqassammata. Qeqertarsuup Tunuani taamatuttaaq ullut arlallit kilisalluni misissuinernut atussamaarneqarput pingaartumik saarullegassutsimik misissuinissaq siunertaralugu.*

*2016-imi sinerissamut qanittumi 34.000 tonsinit pisarineqarsimasunit 250 tonsit Uummannami, 0,3 tonsit Upernavimmi, 250 tonsit Kalaallit Nunaata Kujataani 13 tonsillu Tunumi Tasiilap eqqaani pisarineqarsimapput. 2017-imiit imartat sinerissamut qanittumi aalisarfiusimasut 98 %-ii misissuiffigineqassapput."*<sup>2</sup>

Tassunga atatillugu ataatsimiititaliamit maluginiarneqarpoq Pinngortitaleriffik tamanna tunngavigalugu isumaqarmat ataatsimut isigalugu saarulleqassutsip ineriertorsimancerannik "ilisimasaqarluarluni"<sup>3</sup>. Ilisimasat Pinngortitaleriffiup nammineq misissuinerinnaanit aallaaveqanngitsut, aammali aalisakkanik inuussuteqartunit paasissutissanit (tassa aalisartunit) – tak. pisanik nalunaarsuiffiit, tulaassat pillugit uppernarsaatit il.il.

<sup>1</sup> §37 naapertorlugu apeqqummut akissut nr. 26/2017.

<sup>2</sup> §37 naapertorlugu apeqqummut akissut nr. 20/2017.

<sup>3</sup> Pinngortitaleriffiup aammalu Aalisarnermut, Piniarnermut Nunalerinermullu Ataatsimiititaliap ilisimatitsiffiusumik ulloq 16. november 2016-imi ataatsimiinnerannit.

Tassunga atatillugu § 37 naapertorlugu apeqqummut akissut nr. 26/2017 ataatsimiitaliamit ima paasineqarpoq Pinngortitaleriffik isumaqartoq saarulliit aniseqqinnejartut pillugit ilisimasaqluni, naak amerlassuserpiaat Pinngortitaleriffimmit ilisimaneqanngikkaluartut.

Bundgarninit pisarineqarnermik kingorna saarulliit aniseqqinnejartut amerlassusiisa naatsorsorneqarnissaat, tassungalu ilangullugu saarulleqassutsimut erseqqinnerusumik takutitsisinnaanera ilisimatusarnikkut soqutiginaateqarsinnaasoq ataatsimiitaliap assortunngilaa. Umiatsiaararsortulli sulinerunissaannik peqqusinissamut sanilliullugu ilisimatusarnikkut naleqassusia naammannersoq siunnersuuteqartup naammattumik ilimanarsisinngikkaa ataatsimiitaliaq isumaqarpoq. Tassunga atatillugu ataatsimiitaliamit annilaanngatigineqarsinnaavoq siunnersuut aalisartunit pisariaqanngitsumik allaffissornertut isagineqarsinnaanera, taakkumi bundgarnersorluni pisaqarnerit tamaasa kingorna aniseqqitat qanoq amerlatiginersut naatsorsornerannut piffissamik atuisariaqarnermikkut aalisarnissaminut piffissakinnerulerissaat ilimagineqartariaqarmat.

Siullermeerinninnermi akissuteqaat ataatsimiitaliamit matumani aamma innersuussutigineqassaaq, tassani Naalakkersuisut allammata:

*"Tamatuma saniatigut siunnersuut saqqummiunneqartoq allaffissornikkut suliassaqnerulerlernermik pilersitsisussaavoq. Siunnersuut manna aqquigalugu ilisimasat nutaat pissarsiarineqarsinnaasut allaffissornikkut suliassaqnerulerlernernut iluaqutaasussatut nalilerneqanngillat.*

*Suliniullu taamaattoq ingerlanneqassappat kattuffiit attuumassuteqartut Pinngortitaleriffiullu isumasiornissaat pisariaqassaaq."*

Akissuteqaat ataatsimiitaliamit ima paasineqarpoq; bundgarnersorluni aalisarnermi saarulliit aniseqqinnejartut amerlassusiannik naatsorsuinissamut umiatsiaararsortut pisussaaffilerneqarnissaat Pinngortitaleriffimmit aalisartulluunniit sinniisuanit (ass. KNAPK) maannakkuugallartoq kissatigineqanngimmat.

Tamatuma saniatigut aniseqqitat qanoq annertussuseqarnerannik nalunaarsuineq sinerissap qanittuani saarullittassat amerlineqarnerannik ilumut nassataqassanersoq apeqquserneqarsinnaasoq ataatsimiitaliaq isumaqarpoq. Taamaalillunilu pisassiissutit maanna 36.500 tonsinut annertussusilerneqarsimapput, tamannalu biologit kaammattutaannit 12.379 tonsiusunit malunnaatilimmik qaffasinneruvoq<sup>4</sup>. Imaassinggaavoq - qulaani oqaatigineqartuttut - saarulliit qanoq amerlatigisut aniseqqinnejartarnerannik nalunaarsuineq saarulliit qanoq amerlatiginerannik erseqqinnerusumik, tamatumalu qanoq ineriertornissaata

<sup>4</sup> "Saarullittassat amerlassusilerneqarpuit". Tusagassiorfinnut nalunaarut – Aalisarnermut Piniarnermullu Naalakkersuisoqarfik. 5. januar 2017.

ilimagineqarsinnaaneranut, takussutissiisinnaasoq, kisiannili tamatuma ingerlaannartumik biologit siunnersuinerannik annertunerulersitsinissaa naatsorsuutigineqarsinnaanngilaq.

Aalisarnerup aquinneqarnerani aalisartut ilisimasaasa ilanngutsinneqarnissaannik siunnersuuteqartup siunertaqarnera ataatsimiititaliamit paasilluarneqarpoq isumaqatiginartinneqarlunilu, taamaalilluni aalisarneq pillugu aalajangiinerit aalisartunit biologinillu paasissutissiissutit tunngavigalugit pisalersinnaallutik. Siumut, Inuit Ataqatigiit kiisalu Partii Naleqqap akornanni naalakkersuisooqatigiinnermut isumaqatigiissummut ataatsimiititaliaq innersuussivoq, tassani allassimammatt:

*"Uumasunik ilisimatuut ilisimasaat aammalu aalisartut ilisimasaat naligiimmik toqqammavagineqartassapput, pisassiissutissatut siunnersuutit aalajangersarneqarnerini"<sup>5</sup>*

Sinerissamut qanittumi saarullittassat amerlassusii Naalakkersuisut aalisartunik tusaaniarsimancerattut ataatsimiititaliap isigaa. Ataatsimiititaliap tassunga atatillugu ilanngullugu maluginiarpa § 37 naapertorlugu apeqqummut nr. 205/2015-imut akissummi oqaatigineqarmat:

*"Sinerissap qanittuani pisassiissutit pineqartillugit biologit aalisartullu ilisimasaasigut oqimaaqatigiissitsineq aallaavigalugu naliliisoqarumaarluni"*

Tamatumunnga nangissutitut ataatsimiititaliap pissutissaqarsorinngilaq siunnersummut sukumiinerusumik oqaaseqaqqinnissani.

### **Siunnersuutip aningaasaqarnikkut kingunerititassai**

Inatsisartut suleriaasianni § 33, imm. 1-imi aalajangersarneqarpoq aalajangiiffigisassatut siunnersuutip timitalerneqarnerata aningaasatigut allaffissornikkullu kingunerisassai siunnersummut tunngavilersuutini allaaserineqartassasut. Tamanna naapertorlugu siunnersuuteqartup tamanna nassuaateqarfigisimavaa.

Ataatsimiititaliaq pissutissaqarsorinngilaq siunnersuuteqartup oqaatigisai apeqqusissallugit, ataatsimiititaliali pissusissaatut oqaatigissallugu – akissuteqaatip imarisaata saniatigut siuliani immikkoortoq aallaavigalugu – tunngavilersuisoqarsinnaagaluaromat siunnersuutip allaffissornikkut kingunerisassaanik siunnersuuteqartoq annikinaarisimasoq. Tamanna aatsaat erseqqinnerusumik paasineqarsinnaavoq siunnersuutip erseqqinnerusumik timitalerneqarneratigut.

---

<sup>5</sup> "Naalakkersuisooqatigiinnissamut isumaqatigissut 2016 -2018: Naligiinneq – Toqqisisimaneq – Ineriartorneq" (qup. 9).

**Ataatsimiitaliap inassuteqaatai**

Ataatsimiitaliami **amerlanerussuteqartut** Inuit Ataqatigiinnit aamma Demokratinit sinniisuutitat qulaani oqaasertaliunneqartut tunngavigalugit siunnersuut **akuerineqassasoq inassutigaat.**

Ataatsimiitaliami amerlanerussuteqartut Inuit Ataqatigiinnit aamma Demokratinit sinniisuutitat kaammattuissapput, atortuutit elektroniskiusut ikorsiullugit - aamma assinik filminillu uppernarsaatit saqqummiunnerisigut - nalunaaruteqartarnerup ingerlanneqarsinnaanissa periarfissarsiuunneqassasoq.

Ataatsimiitaliami **ikinnerussuteqartut** Siumumit aamma Parti Naleraq-mit sinniisuutitat siunnersuut **itigartinneqassasoq inassutigaat.**

Taamak oqaaseqarluni isumaliutissiisummilu allassimasutut paasinnilluni Aalisarnermut, Piniarnermut Nunalerinermullu Ataatsimiititaliap siunnersuut aappassaaniigassanngortippaa.

---

Hans Aronen

Siulittaasoq

---

Nivi Olsen

Siulittaasup tullia

---

Knud Kristiansen

---

Nikolaj Jeremiassen

---

Henrik Fleischer

---

Kelly Berthelsen

---

Villy Olsvig